




「永樂北藏」整理委員會

永樂北藏

綫裝書局

御製

天清地寧
風雨調均
烽警不作
化醇俗厚
外順內安
普際光明
大正統五
年十一月
十一日
陰陽和順
百穀常豐
禮教興行
人皆慈善
一統熙皞
既往未來
俱登正覺
七政明朗
萬類咸暢
子孝臣忠
物靡害災
九幽六道

永樂北藏第一二〇冊目錄

- 成實論 續前 (本冊卷第七至卷第二十 丙七—舍十) 一
- 阿毗達磨發智論 二十卷 唐玄奘譯 (傍一—啓十) 三七三

成實論卷第七

丙七

訶 梨 跋 摩 造

姚秦三藏鳩摩羅什譯

苦諦聚行陰論中思品第八十四

經中說思是行陰問曰何等為思答曰願求為思如經中說下思下求下願問曰以何故知求名為思答曰經中說作起故名為行愛陰作起是求如經中說作起皆依於愛又經中說如一束麥置四衢道中六人來打有第七人復更來打比立於汝意云何是為熟不

熟已世尊佛言癡人亦爾常為六觸入之所打如是打時復思後身是為至熟當知求即是思又說意思食應觀如火聚火何所喻是人求後身後身如火常生諸苦故又經中說我即是動處亦是戲論作起依愛隨有我處則有動念戲論作起依愛若作起法說名依愛當知求即是思又說若小兒從生習慈能起惡業思業不不也世尊是義名求欲造惡業又說業者若思思已是中思是意業思已

是身口業思已名為求已又和利經中說尼

延子斷冷水受暖水死時求冷水竟不得而
死生意著天是則以思冷故生故知求即是
思問曰汝言求是思者此是愛相非是思也
所以者何有因有緣經中說癡人所求即是
愛也又大因經中說因愛故求等又經中說
苦者多求樂者不求又說若人欲於五欲欲
即是求又說愛因緣取先求後取求即是愛
是故汝以求爲思是事不然又汝言願是思
者是亦不然所以者何和利經中說不思造
業業則不重不思名不先知世間亦以知爲

思如言云何智者能爲是事誰有思者當作
是事此語義名智者故知知即是思答曰願
名爲集欲分願名思如人願言我未來世得
如是身問曰若欲分願名思者則無無漏思
又思爲愛因如經中說若知見意思食即知
見斷三愛故知思是愛因答曰汝言無無漏
思我亦不說有無漏思所以者何作起行相
故名爲思無漏法無起作相故思是作起非
滅法也又汝言思是愛因是亦不然所以者
何思爲愛果亦是愛分非愛因也以果斷故

說因斷謂意思食斷故三愛斷行等因緣衆
皆以是答故知愛分是思愛有二種有因有
果因名愛果爲求求即是思問曰若因時名
愛果時名思則思非愛分也所以者何若法
在因相異在果相異故知思非愛分如有因
有緣經中說癡人所求即名爲愛愛者所作
即名爲業是故思隨業相故與愛異又若人
貪此事故求是事是故從貪生求求即是思
是故貪爲思因答曰我先說愛分是思愛分
即是愛但愛初起名貪貪已名求又汝言願

者是事不然所以者何願是思分先願名業
後業回向問曰思與意爲一爲異答曰意即
是思如法句中說惡心所作所說皆受苦果
善心亦爾故知意即是思若意非是思何者
爲意業意業名意行緣中是故思即是意雖
總相說意行名思而思多在善不善中說是
思有衆多分若人爲他衆生求善求惡爾時
名思若求未得事爾時名求若求後身爾時
名願故知一思以種種名說
觸品第八十五

識在緣中是名爲觸以三事和合名觸是非觸相所以者何根不到緣是故根緣不應和合以此三事能取緣故名爲和合問曰別有心數法名爲觸所以者何十二因緣中說觸因緣受又說觸爲受想行等因若法無者云何爲因故知有此心數法名爲觸又六六經中說六觸衆又經中說應觀無明等觸若說成假法諸因不應復別說假法又經中有二種觸一三事和合觸二三事和合故觸故知觸有二種一有自體二是假名如日珠牛糞

三事異火月珠異水地等異芽如是觸異眼等有何咎耶又如諸比丘和合不異比丘諸陰和合不異諸陰二木和合不異二木二手和合不異二手衆病和合不異衆病觸亦如是不異眼等復有何咎答曰我先說心能取緣爾時名觸是故心時爲因識生然後受等法生六六經中亦說爾時名觸是有道理又我等不受此二種觸常言三事和合名觸設復有是二種觸經違法相故亦應棄捨是故引經非因又若是觸異如水火者作亦應異

而實不見別有異作故知此觸不異三事又
若觸是心數則與餘心數異所以者何觸是
諸心數緣而觸非觸緣以生異故非心數法
問曰以觸勝故觸緣心數非觸緣觸如受緣
愛非愛緣受答曰觸有何勝相而餘心數無
應說其相而實不可說是故非因受是初時
愛是後時故受緣愛非愛緣受又若觸是別
心數法應說其相而實不可說當知不異又
佛於異法中亦說觸名如說若有苦惱來觸
人身又說受樂觸不放逸受苦觸不瞋此於

受中說觸名字又佛語箭毛鬼言汝觸麤澀
不可近身如世間說火觸是樂亦說觸為食
亦言手觸此等皆於身識所知事中說觸名
字又餘處說盲不觸色亦於色等緣中說觸
名字是觸語不定故非別有此心數法若說
觸是心數則與觸相違所以者何佛說三事
和合名觸故知實無別心數法若法來在身
皆名為觸又隨能與受等心數作因爾時與
名為觸

念品第八十六

心作發名念此念是作發相故念念能更生
異心又說念相能成辦事如經中說若眼內
入不壞色外入在現前是中若無能生異心
念者則眼識不生問曰諸識知皆以念力生
不答曰不也所以者何諸識知生不必定或
以作發力生如強除欲等或以根力故生如
明目者能察毫端或以緣力故生如遠見燈
不見其動或以善習故生如工巧等或以諦
取相故生如所著色或法自應生如劫盡時
釋或以時節故生如短命衆生惡心或以生

處故生如牛羊等心或隨身力故生如男女
等心或隨年故生如小兒等心或以疲倦故
生或以業力故生如受諸欲或以定力故生
如繫心一處知識增長或以必定故生如次
無礙道必生解脫或以久厭故生如厭辛苦
則思甜味或隨所樂故生如對色等或樂觀
色不喜聽聲青等亦爾或以細軟故生如毛
入目則生苦心餘處不然或以苦滅故生如
除目患則食得味或以滅障故生如除欲等
則知其過或漸短次故生如因下生中因中

生上或隨所徧故生問曰若一切知識皆次第相屬何故說無能生異心念耶答曰爲外道故外道等說神意合故知識生爲破此語示諸知識屬次第緣故如是言若人能生異心念者知識不生所以者何以次第緣故則知識有因一一而生又隨所徧處一一識生譬如伐樹隨傾而倒又先說諸識不一時生以是因緣故知諸識一一次第生又諸識法應次第而生不待神意和合如外物芽莖枝葉華實次第而生內法亦如是一一知識次

第而生是念二種一正一邪正謂順理如說正問正難是名可答有理難問又問諸法實相無常性等是名爲正有隨所能成故名爲正故知隨順道念真實念等名爲正念又隨人隨時念名爲正念如多欲人不淨觀爲正念丙七心沒時發相爲正念與此相違名爲邪念六正念能生一切功德邪念能起一切煩惱欲品第八十七

心有所須是名爲欲所以者何經言欲欲以須諸欲故名欲欲又經中說欲爲法本以欲

求故得一切法故名法本又說若諸比丘深
欲我法法則久住若一心所須名為深欲又
如意足中言欲三昧精進三昧心三昧思惟
三昧隨心所須名欲是欲法以精進助修集
定慧從此四事所須皆得名如意分又說汝
欲飛去又一比丘常好讀誦是人修禪得阿
羅漢不復讀誦有天問言汝常好誦今何故
不比丘言我本未離欲故須欲經書今離三
界不復須也所有經書禪定智慧聖人皆說
是可捨法故知以須為欲因所須故貪於諸

欲是名貪欲

喜品第八十八

欲心好樂是名為喜如說眾生性類相從喜
惡隨惡好善從善是名為喜問曰性不名喜
所以者何佛知眾生種種諸性是性智力知
種種喜是欲智力故知性喜各異答曰久修
集心則名為性隨性生喜是故知久集心有
名性智力知隨性生喜名欲智力故說眾生
隨性相續從長集惡心則好喜惡久集善心
則喜樂善若寒者喜熱是現在因緣不從性

生是爲性喜差別

信品第八十九

必定是信相問曰必定是慧相必定名斷疑是名慧相答曰未自見法隨賢聖語心得清淨是名爲信問曰若然者自見法已不應有信答曰然阿羅漢名不信者如法句中說不信者不知恩者名爲上人又經中說世尊我於是事隨佛語信若自見法心得清淨是名爲信先聞法後以身證作如是念此法真實諦不虛誑心得清淨是名爲信在四信中譬

如病人先信師語服藥差病然後於師生清淨心是名爲信是信二種一從癡生一從智生從癡生者不思善惡於富蘭那等惡師所生清淨心從智生者如四信中於佛等生淨心是信三種差別善不善無記問曰是不善信即是煩惱大地中不信法非是信也答曰非不信法信是淨相是不善信亦是淨相若不爾則不善受不應名受而實不然故有三種差別若信在根數隨順解脫在三十七品則定是善

勤品第九十

心行動發是名為勤常依餘法若念若定於中發動一心常行是名為勤勤有三種善不善無記若在四正勤中是名為善餘不名善行者若信不善過患善法利益然後生勤為斷不善集善法故故次信根說精進根是勤入善法中名曰精進能為一切利益之本以此精進助念等法能得大果如火得風多所焚燒

憶品第九十一

知先所更是名為憶如經中說久遠所更能憶不忘是名為憶問曰此憶在三世中所以者何經中說憶一切皆宜又此憶在四憶處是四憶處亦三世緣何故但說緣過去耶答曰此言皆宜非為三世若心掉沒則憶隨二處是名徧行汝言四憶處三世緣者是中慧能現在緣非是憶也是故如來先說憶名解則說慧問曰云何異識所更異識能憶答曰憶法如是於自相續生滅法中即生異識還自能緣又知識法爾異識所更異識能知如

眼識色意識能知又他人所用他人能知如
諸聖人乃至宿命餘身所更憶力故知問曰
若知先所更名為憶者今識等法皆應名憶
所以者何是法亦行先所更故答曰識等法
亦說是憶如佛語薩遮尼延子言汝憶本事
當答又說若憶^{丙七}先戲樂則煩惱發故識等法
憶本事故亦名為憶是憶從取相生隨法取
相是則憶生異則不生定慧定慧品中當說
覺觀品第九十二

若心散行數數起生是名為覺又攝心中亦

有麤細麤名為覺以不深攝故名麤心如經
中說佛言我行有覺觀行是故初禪未深攝
故名為覺散心小微則名為觀是二法者徧
在三界以是心之麤細相故又散亂心名為
覺觀以此相故應一切處又未現知事以比
知思量應爾不爾是名為覺是故思量未現
知事故有正覺邪覺之名離分別思量則名
正見是三種知邪覺是顛倒思惟謂無常中
常等正覺是未得真智以比相知是行者在
達分善根中是說名忍如是等餘順道比知

名為正覺是中若離憶想分別名現在知於此覺中思惟籌量以此因緣故如是此因緣故不如是是名為觀問曰有說覺觀在一心中是事云何答曰不然所以者何汝等自說喻如打鈴初聲為覺餘聲為觀又如波喻麤者為覺微者為觀是時方異故不應一心又五識無分別故無有覺觀相

餘心數品第九十三

若不行善或邪行善名為放逸無別一法名為放逸爾時心行名為放逸與此相違名不

放逸若善心行名不放逸亦無別法又心隨不善名為放逸隨順善法名不放逸善根者不貪不恚不癡以思量為首能無貪著名為不貪以慈悲為首不生忿怒是名不瞋以正見為首不謬不錯是名不癡無一別法名為不貪有人言無貪名不貪是事不然所以者何無貪名無法無法云何與法為因無瞋無癡亦如是又與三不善根相違故但說三憍慢等亦應是不善根以略故說三不善根不善品中當說無記根者又人說四謂無記愛

見慢無明又有人說三愛無明慧是非佛所
說隨無記心何因緣生名此因緣爲無記根
又身口業多從無記心起故無記心名無記
根心行時能令身心安靜除滅麤重爾時名
猗種種心時名捨若諸受中不了心行名捨
諸禪中離苦樂任放心行名捨七覺中不沒
不動平等心行名捨離憂喜得平等心名捨
四無量中離憎愛心名捨如是隨種種法相
違故則有無量心數差別
不相應行品第九十四

心不相應行謂得不得無想定滅盡定無想
處命根生滅住異老死名衆句衆字衆凡夫
法等得者諸法成就爲衆生故有得衆生成
就現在世五陰名爲得又過去世中善不善
業未受果報衆生成就是法如經中說是人
成就善法亦成就丙七不善法問曰有人言過去
善不善身口業成就如出家人成就過去戒
律儀是事云何答曰是皆成就所以者何經
中說若人爲罪福即是已所有二事常追其
身猶影隨形又經中說殃福不朽謂能得果